

Manusia Akhir Zaman

Daripada Ali bin Abi Talib RA, Rasulullah SAW bersabda:

يَأْتِي عَلَى النَّاسِ زَمَانٌ يَكُونُ الْمُؤْمِنُ فِيهِ أَذَلَّ مِنْ شَاتِهِ.

Maksudnya: "Akan datang kepada manusia satu masa di mana seorang mukmin lebih hina daripada kambingnya."

Hadis ini diriwayatkan oleh Ibn Asakir dalam Tarikh Damsyik (15/390/2)

Pedoman dan Iktibar Hadis

Antaranya:

1. Umat Islam akan menjadi mulia dengan berpegang kepada ajaran Islam sebaliknya menjadi hina bahkan dijajah oleh musuh jika berpaling daripada agamanya yang maha suci. Benarlah kata-kata Sayidina Umar ketika pembukaan kota Baitul Maqdis, antara ucapannya berkata: "Kami adalah kaum yang dimuliakan Allah dengan Islam. Jika kami mencari kemuliaan selain daripada itu nescaya kehinaanlah yang menimpa kami."
2. Bacalah sejarah yang menjadi sebaik-baik saksi dan bukti. Orang-orang Perancis masuk ke negara al-Jazair dan membinasakan menara-menara Islam di sana. Maka salah seorang ulama al-Jazair (Abdul Hamid Badis) memperingatkan dan menerangkan kepada rakyat al-Jazair terhadap risiko dan pengaruh kemaksiatannya supaya mereka meninggalkan arak, zina dan riba.
3. Namun apabila mendengar peringatan itu, mereka malah berputus asa daripada rahmat Allah sehingga mereka semakin bertambah membuat kemaksiatan.

Maka ulama itupun kembali ke rumahnya dan berdoa kepada Allah supaya ditunjukkan kunci yang dapat memperbaiki hati orang-orang al-Jazair, supaya mereka kembali kepada Allah. Akhirnya dia teringat, bahawa tidak ada kunci kecuali mengharap rahmat Allah, maka diapun menyampaikan sebuah ucapan yang sangat masyhur dari atas mimbar di bahagian selatan al-Jazair:

شَعْبُ الْجَزَائِرِ مُسْلِمٌ وَإِلَى الْعُرُوبَةِ يَنْتَسِبُ
 مَنْ قَالَ حَادَ عَنْ أَصْلِهِ أَوْ قَالَ مَاتَ فَقَدْ كَذَبَ

Bangsa al-Jazair adalah bangsa yang muslim,

Dan dia berhubung dengan bangsa Arab.

Barangsiapa yang mengatakan aku telah mengancamnya,

Maka hakikat itu kalah atau bohong.

4. Atau sebagaimana yang dikatakan. Kemudian dia mengatakan: Sesungguhnya rakyat al-Jazair tidak kembali kepada Allah kecuali bila mereka memiliki rasa berharap terhadap rahmat-Nya. Maka dia pun menyampaikan hadis-hadis yang menjelaskan tentang taubat dan harapan serta keutamaan yang Allah berikan bagi orang-orang yang bertaubat kepada-Nya.
5. Maka tatkala mereka mengetahui bahawa ada Tuhan yang Maha Penyayang lagi Maha Pengampun, Maha Penerima taubat hambanya dan Maha Mengampuni dosa hambanya, akhirnya mereka pun masuk ke dalam agama Allah secara berpusu-pusu.
6. Hanya dalam jangka masa satu tahun, mereka telah menghasilkan sejuta syuhada dan menundukkan Perancis dengan segala kesombongan dan kekejamannya serta menenggelamkannya ke dalam bumi dan mengusir penjajah itu daripada negeri mereka.
7. Maksudnya bahawa harapan itu adalah pintu yang sangat besar dan kunci untuk berjumpa dengan Allah.
8. Kehinaan merupakan musuh utama bagi manusia kerana dengannya nilai dan maruahny akan menjadi mainan manusia. Tetapi mestilah diingat bahawa

kehinaan akibat daripada lalai dan cuai perintah Allah adalah lebih besar balanya. Ini kerana bukan semata-mata hina di dunia, tetapi ia berlangsung hingga di akhirat.

Mutiara Hikmah

- ❖ **Pujangga berkata:** Seringkali kenikmatan itu akan melahirkan penyesalan, kesalahan remeh akan menghantar kepada kehinaan, kemaksiatan akan mengakibatkan hilangnya nikmat, dan ketawa akan berakhir dengan tangisan.
- ❖ **Pujangga berkata:** Jika anda ingin merasakan kebahagiaan bersama orang lain maka perlakukanlah mereka dengan cara yang sama yang anda sukai ketika mereka memperlakukan anda, jangan meremehkan milik mereka dan jangan pula merendahkan kemampuan mereka.

Kisah Teladan

Di antara peristiwa yang paling ajaib, iaitu peristiwa yang diceritakan oleh Abu Jaafar al-Saih, beliau berkata: Habib Abu Muhammad adalah seorang peniaga yang mengamalkan riba. Pada suatu hari dia berjalan di hadapan kanak-kanak, kemudian salah seorang kanak-kanak itu berkata kepada kawannya yang lain: “Pemakan riba telah datang.” Maka Habib pun memalingkan kepalanya ke arah kanak-kanak itu dan berkata: “Ya Allah, Engkau dedahkan rahsia burukku kepada anak-anak.” Kemudian dia pulang dan mengumpulkan seluruh hartanya dan berkata: “Ya Allah, aku adalah tawanan-Mu, aku ingin membeli diriku dengan seluruh hartaku ini, maka merdekakanlah aku.

Ketika pagi harinya, dia menyedekahkan seluruh hartanya dan menghabiskan waktunya untuk beribadah. Kemudian pada suatu hari ketika dia berjalan di hadapan kanak-kanak, salah seorang daripada kanak-kanak tersebut berkata kepada kawannya yang lain: “Diamlah, Habib seorang ahli ibadah telah datang.” Maka menangislah Habib dan berkata: “Ya Allah, Engkau pernah mencemuhku dan sekarang Engkau memujiku dan semuanya adalah milik-Mu.